


成案質疑

人命十

卷十九之九



漢書門			
九	二	八	
七	五	〇	
五			
冊	架	函	號 類

內閣文庫		
九	二	漢
七	〇	書
五		
冊	架	函 號 類

內閣文庫		
番號	漢	9248
冊數	75 ( 48 )	
函號	296	100






糧船持械鬪毆殺傷多命

康熙五十八年九月刑部會看得署總督倉場事務阿錫鼎等題

湖廣杭州各幫頭舵水手鬪殺一案夾訊據湖廣黃州衛三幫糧船頭工劉漢章供我係旂丁雷羅潘所僱的人我們重運糧船行至武清縣南倉地方頂幫泊船有杭州幫高國正回空糧船撞着我們的重船毆打不意他們聚眾用弓箭鳥鎗亂打我們船上人也拿鳥鎗木槓等械趕去毆打因天晚散了二十四日有襄陽衛二幫之朱大鬍子同繆二趙四李二四人來向我們說了隨趕去打了一次二十五日又與杭州幫人打了一次朱大鬍子等俱被杭州幫人打死了去年八月二十二等日我們與杭州幫打架之時旂丁雷羅潘是在船上的他曾否同去因人多不曾看見並不是旂丁等商謀率眾令旂丁現在湖廣等語夾訊據杭州右衛後幫船工高國正供我係旂





丁楊綸所僱的人楊綸在通州交米我們空船回去行至南倉地方我船上水手徐大撐船行走扯着湖廣三帮重船他們船上劉漢章就叫水手人等將徐大打倒我們也會了船與湖廣帮人打架後我聽見我們船上水手說我們幫內人放箭射着人了。我懼怕就將船開行了湖廣帮人就從岸上趕來向我們船上用鳥鎗亂打時鄭國章的表弟小劉四中鳥鎗死了徐大被打當晚也死了二十四五兩日他們如何打架之處我不知道等語。夾訊據杭州前衛前帮頭呂大年供我係旂丁陸起所僱的人我們船住在馬蹄灣湖廣帮人持弓箭鳥鎗等械來將我們後帮船打了後帮船上人陳起龍薛公亮同趙玉來對我說了我就同他們去打湖廣帮人一次二十五日又打了一次是實餘處俱與高國正供同夾訊據杭州前衛前帮水手趙玉供我係旂丁白弼所僱的人餘處與高國正供同夾訊杭州前

衛後帮旂丁張聰船上頭工薛公亮俱與呂大年供同夾訊據杭州前衛前帮旂丁白榮船上舵工陳起龍供我們船住馬蹄灣湖廣帮人持弓箭鳥鎗等械來將我們後帮人打了因我的女兒也被打下河去淹死了我同趙玉薛公亮去邀呂大年帶領眾人與湖廣帮打架是實餘處與呂大年供同各自行招認湖廣杭州帮頭舵水手因扯船角口細事即聚眾相打各持鳥鎗弓箭等械一連三日鬪殺傷人大于法紀不便照尋常鬪毆殺人律擬罪除湖廣帮糾眾爲首之朱大鬍子繆二趙四李二當場被殺身死杭州帮爲首糾眾之陳起龍薛公亮取供後在監病故均不議外湖廣帮之劉漢章杭州帮之高國正呂大年趙玉均照故殺律擬斬監候秋後處決逐一分別夾訊湖廣帮頭工田魁水手王大孫強兒舵工徐萬良雖俱供並不曾去打架等語但合帮持械鬪三次伊等豈無助毆之處除張問志



取供後病故不議外田魁王大孫強兒徐萬良鄭國章小王王二王士魯國祥米起儒俱不准援

赦均合依兇徒因事忿爭執持兇器傷人律僉妻發邊衛充軍至配所各責四十板審據杭州前衛前幫隨幫官趙綸章等雖供我們俱在通州領回空限單並不會看見相打二十六日我奉文押回空南去了並非我不行禁止等語但伊等所管頭舵水手聚眾鬪殺並不能禁止又不將被殺之人查明呈報不合外委千總趙綸章張嘉猷萬浩俱係無職之員亦不准援

赦均應照知同伴人欲行謀害他人不卽阻當救護及被害之後不首告律杖一百各折責四十板據千總熊炳等供我去攔阻看時無如烏合之眾不聽吩咐就打起架來等語又據湖廣襄陽府通判章衡供我當卽通行傳諭各幫千總吩咐不許打架一面報明地方官一面

親至通州報明倉場大人并坐糧廳隨將被殺之人數詳報等語查定例官員約束不嚴降一級調用等語今湖廣領運千總熊炳陳偉吳宗煦雖將鬪殺情由及被殺人數報明押運通判章衡但平日不能約束臨時又不能禁止以致聚眾鬪殺不便照此例議處應將千總熊炳陳偉吳宗煦照運官不行約束縱丁毆斃民命例革職通判章衡押運是其專責二十二日兩幫鬪殺該通判理應嚴行禁飭保守重運將起釁情由飛報該管衙門乃敢擅離職守假公赴通以致二十四五兩日殺傷多命平日既不能約束臨時又任意縱容迨至事發復借赴通巧于脫卸應將襄陽府通判章衡照溺職例革職查嘉興府同知王沛聞湖州府同知高珣倉場總督原奏疏內雖稱在通交卸糧米未在同空船上但既聞頭舵水手鬪殺應宜回船查明殺傷人數具報反不具報輒隨船回去殊屬不合應行文漕運總督



題叅到日議處再據陞任天津總兵馬見伯疏稱所有不行查出相打持用鳥鎗之武清營兼轄遊擊田見龍蒲溝專汛把總劉奉召相應糾叅等語查定例內民間私藏鳥鎗不行查出之該管官罰俸一年等語查把總劉奉召遊擊田見龍俱係催漕之員兩幫舵工水手各持鳥鎗互相鬪殺不能查禁以致殺傷多命不便照此例議處應將專汛把總劉奉召革職兼轄遊擊田見龍降一級罰俸一年又據直隸巡撫趙弘燮疏稱查雖係運丁兇橫但見在武清縣所轄地方該縣知縣王允懿既不能預行查禁事後亦即應親赴拘犯驗屍一面星飛報臣乃遲至閏八月初三日始據該縣據運官縣丞之文具報到臣又未查明殺傷確數且此等重案猶稱角口打架誠諭解釋殊屬玩忽等語查定例地方民人聚眾千餘執持器械兩相對敵殺傷多人州縣官雖報司府未報督撫降一級調用等語查此案糧船

舵工水手鬪殺該縣遲至閏八月初三日止稱口角打架具文申詳並不將殺死人命確查飛報不便照此例議處應將武清縣知縣王允懿降三級調用查有加級抵銷再杭州幫旂丁楊綸湖廣幫旂丁雷羅漢等所僱人等互持鳥鎗弓箭故殺致死多人應從重治罪但旂丁等既經回去曾否鬪毆有無為首打架之處俱未取口供不使遽行懸擬應行文漕運總督將楊綸雷羅漢等各旂丁有無為首打架打架時曾否在船逐一嚴審定擬具題到日另結奉

旨劉漢章高國正呂大年趙玉俱依擬應斬着監候秋後處決餘依議



土番殺人放火比照強盜例治罪

雍正十一年十一月刑部會議覆臺灣淡水外北投社土番本納等射死庄民江勤并焚燒房屋一案據福撫趙 疏稱緣雍正十年八月初二日本納為首起意邀同本社土番乖仔祿羅漢仔各帶弓箭射人乖仔等允從於一更時分行至瓦笠庄地方適吳宗僱工人江勤聞犬吠聲開門出視本納看見隨即放箭射傷江勤右脇江勤喊叫跑入屋內時吳宗與隣佑人等聞聲奔逃本納復令乖仔放火焚燒張廷泮草房三間乖仔祿羅漢仔一同放箭並未傷人旋即逃回次日吳宗往報江勤之兄江烏將江勤擡回并同甲長張瑞嵩等尋獲番箭一十九枝具報署淡水同知尹士佺緝究江勤傷重越三日殞命緝獲本納等到案歷審各認不諱本納乖仔糾聚同夥射箭傷人放火焚燒房屋祿羅漢仔雖未傷人聽從同行放箭均屬兇惡



已極除本納取供後在臺灣縣監病故不議外將乖仔祿羅漢仔照例刺字均比照強盜殺人放火燒人房屋不分會否得財例擬斬立決梟示知情不首之只仔留等擬杖先行發落等因其題應如該撫所題乖仔祿羅漢仔均應比照強盜殺人放火燒人房屋不分會否得財例擬斬立決梟示該撫既稱聞知本納等射人情事不行首告之只仔留照知人謀害他人不首告律杖一百祿羅漢仔之父夏瀨照同姑父兄知情不首告例杖一百不行管束查稟之甲長甘軒社丁何田張陞俱照不應重律各杖八十革去甲長社丁遇熟審各杖一等照例折責先行發落等語應無庸議再該撫疏稱本納係應擬斬立決之犯所有監斃管獄官臺灣縣典史王咸英相應附奉德候部議等語應將管獄官臺灣縣典史王咸英照例罰俸一個月奉旨乖仔祿羅漢仔俱著卽處斬梟示餘依議

毆殺誤擬故殺

康熙四十一年五月刑部會看得陳四美等打死張鏞一案據直撫李光地審擬斬流枷號杖罪具題查陳四美族人陳玉與張鏞之父張其蘊爭奪地土其蘊控府詞內因有陳文淵名姓文淵潛避康熙三十九年 月 日文淵之子陳檳被差拘帶文淵以事由陳玉而起令陳玉之弟濟可往喚伊兄陳玉見官并相商欲邀奪伊子陳檳濟可不阻陳文淵遂于 日率次子陳四美并宋大李三各持木棍潛伺于寇庄窰內適張鏞騎騾經過四美將騾拉住張鏞揮鞭欲打騾驚跌下四美持棍連毆張鏞頭顱宋大等亦各持棍助毆四美復棍毆耳根張鏞傷重立時畢命各犯畏罪潛逃其蘊見騾奔回令姪張鐸并鄉長楊用世等往覓遇陳文淵之親周昌宗等踉跟可疑卽行拏獲私行拷逼信口妄供多人迨文淵父子投首陳濟可等陸續



就獲歷審情真查律內臨時有意欲殺非人所知曰故等語歷審陳四美等共毆張鏞致死並無臨時欲殺之供該撫擬以故殺與律不符陳四美合收依共毆人因而致死者以致命傷為重下手者絞律擬絞監候秋後處決陳文淵合依原謀律僉妻流三千里至配所杖一百折責四十板陳濟可依不應重杖律杖八十張鐸楊用世俱應照番役人等獲盜私刑取供例枷號一個月各責四十板楊用世革去鄉長妄告多人之張其蘊毆打無辜之張十俱經病故毋庸議宋大李三馬三陳直緝獲另結周昌宗等審係無干毋庸議再該撫疏稱青縣降調知縣周迪不行審出真情遽將陳文淵擬絞相應附叅等語應將青縣降調知縣周迪照例議處查周迪已經別案革職毋庸議奉

旨陳四美依擬應絞着監候秋後處決餘依議

共毆之人雖非致命亦擬克軍

雍正八年六月刑部會議河督田 題確山縣張龍等毆傷趙七身死一案蘇四雖毆非致命但以不干已之事執持鋤鈎疊擊趙七臙肌骨斷碎爛殊屬兇惡應照執持兇器傷人律僉妻發邊衛克軍至配所杖一百折責四十板奉

旨依議



毆人原因肆詈不作故殺糾人本欲挑稻不作原謀

雍正十三年四月刑部會議覆浦城縣民吳法生等毆死江良一案  
先據福撫趙 疏稱緣黃明哲與康仙庵僧人賢悟告爭田畝雍正  
十年八月初七日賢悟先將田穀割去一半黃明哲告知堂兄黃明  
祿黃明祿遂主令糾人爭割令妻弟吳法生僱謝貴弟黃明哲又邀  
吳維振於十五日早同至黃明祿家黃明祿患病未行指使吳法生  
等各帶竹篙扁挑叉口同至田間適賢悟工人江良在田打穀黃明  
哲向前爭阻江良隨持棍毆打黃明哲黃明哲將所持竹篙戳江良  
左臂膊左肱肘脚蹠腦後滾落下田吳法生走至塍下江良看見詈  
罵吳法生卽扳取插田竹尖戳傷江良顙門江良欲掙起還毆吳法  
生頓起殺機復用竹尖狠戳江良頂心偏右時吳維振後至途遇賢  
悟兩相爭較吳維振亦用竹尖戳傷賢悟右額角江良傷重是晚殞



命賢悟傷輕平復歷審各認不諱查吳法生係最後下手又連狠戮江良致命重傷明係臨時有意將吳法生依故殺律擬斬監候黃明祿依原謀律擬流黃明哲等擬杖等因具題經臣部等衙門議覆以黃明祿令吳法生攜帶竹筒扁担至田挑稻並未知其前往聞毆嗣吳法生因江良與黃明哲打鬧黃明哲筒戳江良滾落田裡吳法生趕至礮下江良輒行詈罵吳法生隨手拔路旁插田竹尖戳傷江良顛門頂心至晚斃命是吳法生與江良實係一時格鬪並非有心欲殺該撫將吳法生擬以故殺黃明祿擬以原謀均未允協且查吳法生供內並無有意致斃登時殺訖情事何以看語內突加吳法生頓起殺機明係臨時有意之語供看不符未便率結應令該撫再行詳訊務得實情妥擬具題到日再議等因題駁去後今據該撫疏稱覆審據吳法生供稱是日黃明祿令其攜帶竹筒扁挑原只叫其赴田

挑回稻穀並無主使鬪毆情事嗣江良被黃明哲戳落田中吳法生趕至礮下與江良詈罵吳法生遂拔路旁插田竹尖戳江良顛門因江良又欲掙起還打吳法生又戳江良頂心是該犯實係一時爭毆並非有心致死亦非登時殺訖吳法生應改擬絞監候黃明祿雖審無謀毆情狀但不合代黃明哲散米僱人爭割田穀起釁改擬杖八十發落黃明哲吳維振謝貴弟賢悟先經分別擬杖折責應免重科等因具題應如該撫所題吳法生合依共毆人傷皆致命以最後下手傷重者當其重罪律擬絞監候秋後處決該撫既稱代黃明哲散米僱人爭割田穀之黃明祿改依不應重律杖八十飭行折責發落黃明哲毆有重傷而非兇器應同在場傷人之吳維振與受僱同往之謝貴弟俱合依餘人律杖一百不候審斷擅割田穀起釁之僧人賢悟合依不應重律杖八十先經折責在案應免重科等語均毋庸



議黃明哲等所爭田畝飭令地方官勘明另結再該撫疏稱此案錯擬罪名之承審各官臣與浦城縣知縣杜昌丁於部駁之後即行改正其前署建寧府事候補道府呂大雲已補泉州府知府前按察使李玉鉉已經休致俱經卸事未及查收相應一并聲明附叅聽候部議等語查定例部駁再審事件督撫按律改正具題從前承審舛錯之處免其議處等語除李玉鉉已經休致呂大雲已經卸事未及查收均毋庸議外應將從前錯擬罪名部駁之後即行改正知縣杜昌丁巡撫趙均照例免其議處奉

生依擬應絞着監候秋後處決餘依議

始言驅逐繼喝毆打亦作元謀

雍正十一年十二月刑部議覆饒平縣民詹淡山與詹芳輪等毆傷倪氏身屍一案據廣撫楊疏稱緣倪氏之男詹時偉於雍正十年十月初一日早窺無服族叔詹石恩遠出潛至其家調戲伊妻張氏張氏投訴族人詹淡山等議照鄉規將時偉驅逐出境隨赴縣控究訊明枷責結案迨雍正十一年正月內詹石恩歸家于是月三十日酬神延請族人詹淡山詹芳輪詹在止詹阿朝詹公生赴飲詹淡山復理前言以詹時偉犯姦應照鄉規驅逐詹芳輪等咸以為然飲畢齊至詹時偉之門聲言趕逐因詹時偉外出伊母倪氏聞知出而辱罵詹芳輪等與之互罵倪氏即入房內手持穢布出打詹芳輪用拳打傷倪氏右臂膊并右脊背倪氏氣忿復持穢布亂打詹淡山見其潑賴即叱以可惡好打之語倪氏聞言即向打詹淡山詹在止在旁



遂用拳毆倪氏顛門詹阿朝亦用拳毆倪氏左脊背倪氏愈忿仍持  
 穢布上前向打適詹公生對面相迎倪氏將布打去詹公生用拳回  
 毆傷中倪氏左乳復用手向推以致手指戳傷倪氏心坎倒地倪氏  
 傷重是晚殞命詹公生懼罪逃躲石壁山寮內自縊身死歷審不諱  
 查詹公生係最後下手推毆倪氏左乳心坎傷重倒地合依共毆人  
 傷皆致命以最後下手重者當其重罪律擬絞已經畏罪自縊身死  
 無庸議詹淡山倡言往逐又在場吆喝應照元謀律擬流詹芳輪詹  
 在止詹阿朝均照餘人律擬杖等因其題應如該撫所題詹淡山合  
 依同謀共毆人致死元謀杖流律僉妻流三千里至配所杖一百折  
 責四十板奉

行依議

邀人尋覓以致毆斃照元謀定擬

乾隆元年十一月刑部會議覆新興縣民傅佩九毆死蘓締建一案  
 據廣撫楊 疏稱緣雍正十三年閏四月初十日傅佩九族人傅述  
 章失去猪隻尋覓無踪是月二十一日稔村墟期傅述章見蘓締建  
 在墟賣猪認係所失猪隻同子傅廷重攙回蘓締建跟至其家爭論  
 經投傅英求議處英求令其放猪視猪歸入何家即屬何家之畜走  
 回傅述章家內傅英求遂罵蘓締建偷猪締建回罵傅英求冒認英  
 求用拳毆打蘓締建左臂膊聲言送究蘓締建回稱此猪買自高村  
 之人傅英求令其尋出猪主對質明白至二十二日傅英求見蘓締  
 建尚未尋有猪主回報邀同傅佩九傅得九并傅廷重齊至蘓締建  
 門首喚出詢問猪主蘓締建答稱尚未往尋傅英求就令得九拉同  
 蘓締建至高村尋覓路經傅英九等寨前傅得九傅廷重入寨取火



喫烟蘓締建因見天晚路遠往返不及卽向傅英求告以次早往尋  
轉身走回傅英求趕上拉住後衣蘓締建轉身扭住傅英求衣領傅  
佩九見傅英求被扭上前解脫蘓締建之手締建卽用拳打傅佩九  
左肩佩九忿怒用拳向打適中蘓締建左耳根仆跌被石癰傷左臂  
膊蘓締建傷重殞命傅英求畏懼令傅佩九採取毒草搗汁灌入屍  
口圖作服毒自盡以爲卸罪之計屢審不諱將傅佩九等擬以絞流  
杖罪援免具題應如該撫所題傅佩九合依鬪毆殺人律擬絞監候  
秋後處決傅英求合依元謀律僉妻流三千里至配所杖一百折責  
四十板傅廷重傅得九均依不應重律杖八十事在

赦前均應援免仍向傅佩九名下追埋墓銀二十兩給付屍親收領奉  
旨依議

喚同弟侄與人爭角亦作原謀

雍正六年七月刑部會議覆寧德縣民陳守鼎陳林使等毆死黃爾  
振一案據福撫常 疏稱緣陳守鼎等有公共祖田二畝五分於  
熙五十三年間賣與陳子和陳子和於雍正三年轉賣與黃爾振  
係陳守鼎等耕作嗣黃爾振欲行自耕於雍正五年四月二十八日  
帶同僱工人陳午生陳君鼎往田佈插陳守鼎聞知喚弟黃光使侄  
陳林使并子陳景珠赴田較阻兩相爭角陳守鼎先以手指黃爾振  
眉叢黃爾振卽以挑秧木棍毆打陳守鼎陳守鼎亦以木棍還打黃  
爾振顛門黃爾振復毆陳守鼎頭顛倒地陳光使以竹杖戳黃爾振  
右臀遂棄杖扶陳守鼎陳林使亦以木棍毆打黃爾振左腋肌棍被  
黃爾振打落陳景珠亦以木棍毆黃爾振右臍陳林使又取過陳  
光使所棄竹杖刺傷黃爾振腎囊陳景珠之妻余氏聞夫翁被毆前



至救護亦用做鞋鉄錐刺黃爾振胎膊右肋黃爾振傷重次日殞命  
 歷審不諱除陳林使最後下手刺傷黃爾振致命腎囊應擬絞抵已  
 經在監病故不議外將陳守鼎依元謀律擬以杖流陳光使陳景珠  
 余氏俱依餘人律擬杖分別減等收贖并陳林使病故圖結送部等  
 因具題查律同謀共敵人致死傷皆致命以最後下手重者當其重  
 罪元謀杖一百流三千里餘人各杖一百等語陳守鼎喚同弟侄前  
 徃角毆致死人命應如該撫所題合依元謀律僉妻流三千里至配  
 所杖一百折責四十板陳光使陳景珠余氏俱合依餘人律各杖一  
 百余氏係婦人照律收贖陳光使陳景珠該撫既稱時逢熱審照例  
 減等已經折責發落無庸議再該撫疏稱所有監斃陳林使之管獄  
 官係寧德縣典史孫應齡承審官係寧德縣知縣申茂合將各職名  
 附叅等語查定例斬絞重犯監斃一人者管獄官罰俸一個月又定

例承問官將正犯取有口供監斃一二人者免議等語除承審病斃  
 一名之知縣申茂照例免議外應將監斃絞犯陳林使一名之典史  
 孫應齡罰俸一個月查孫應齡已經丁憂應於補官日罰俸一個月  
 奉

旨依議 謹查婦人罪犯笞杖律應的決即犯流徒亦應決杖餘罪收贖  
 並無笞杖亦准收贖之文惟條例內則有有力者姑准納贖人皆  
 忽略然婦人犯笞杖准其收贖亦不失為忠厚



兇犯脫逃元謀擬流

乾隆五年十一月刑部會議覆謝天都等扎傷董瑄身死一案據河  
撫雅 疏稱謝天都與伊叔謝五勤曾借董瑄族叔董國炳銀兩向  
索出言詬詈謝天都氣忿與謝五勤商同約人謀毆洩忿謝天都復  
約伊兄謝鳳池僉楊文舉王天樞王紅曹振李聰程海黃貞共毆俱  
各允隨各執鎗桿尋毆董國炳躲避謝天都等見董瑄自集甫回因  
董瑄係董國炳之侄謝天都用鐵鎗先扎傷董瑄右膀謝五勤用鐵  
鎗扎傷董瑄臍肚倒地楊文舉王天樞王紅各持竹桿鎗扎傷董瑄  
左右臍腹三處謝鳳池曹振李聰程海黃貞站立橋北僉未助毆記  
董瑄傷重殞命當經拿獲謝鳳池關獲謝天都嗣又拿獲楊文舉等  
屢審不諱謝五勤持鎗扎傷董瑄臍肚致命應照律擬抵王紅係餘  
人俱現在脫逃俟緝獲另結外謝天都應照律擬流楊文舉等擬杖



并聲明謝天都有妻郭氏等因具題應如該撫所題謝天都合依原  
謀杖流律僉妻流三千里至配所折責四十板楊文舉王天樞俱合  
餘人律杖一百脫逃之謝五勤王紅緝獲另結該撫既稱在場未  
經助毆之謝鳳池曹振李聰程海黃貞等俱照不應重律杖八十各  
照例先行折責發落謝天都所欠董國炳銀兩照數給領等語均無  
庸議再緝兇不力之鹿邑縣知縣秦梅照例住俸勒限一年緝拿奉  
旨依議

原謀不行亦擬流罪

雍正元年六月刑部會議覆葉諧葉珀致死許厚許丁一案據福撫  
黃 審擬絞流杖罪援

赦具題查康熙六十年十一月二十七日葉葉爲子四明娶親路經許姓  
之鄉時有許厚許丁許躍等在埭修岸四明迎娶之轎挨跌許躍下  
溝躍卽以泥污花轎致相角口葉葉聞知卽叫葉珀葉慶葉學前往  
較鬧珀遂持鐵錘而往路遇葉諧往山桃草葉慶邀其同行許厚等  
尚在築岸兩家爭鬧許厚許丁持鋤趕打葉珀以錘戳傷許丁心坎  
葉諧以扁挑戳傷許厚右乳許厚許丁俱逾時殞命歷審不諱葉諧  
葉珀俱合依鬪毆殺人律擬絞監候秋後處決葉葉合依原謀律杖  
一百流三千里葉慶葉學俱照不應重律杖八十但葉諧等事犯在  
康熙六十一年十一月二十日



恩詔以前均應免罪釋放照律向葉諧葉珀名下各追埋葬銀二十兩給  
付死者之家奉

旨依議

原謀未經同毆亦擬流罪

雍正元年十月刑部會議覆張六斤毆死沈良相一案據直撫李

審擬流枷杖罪援

赦具題查沈良相之甥陳洪和伊妻成氏因奸情敗露遷居無極縣地方  
成氏又與周佩顯王四潘桂枝通奸將女招贅温虎山之子為婿後  
洪和物故洪和之兄陳洪瑞商之沈良相將氏改嫁與嚴爾泰為妻  
虎山以子媳具控州同州同以洪瑞不養弟婦責懲適郝焯緣糧務  
亦在州同衙門沈良相疑郝焯唆控同子沈鳳鳴至郝焯寓內羞辱  
焯心不甘欲毆良相於康熙六十一年二月二十一日帶舊僕張六  
斤劉成各帶鉄尺入城郝焯行走困乏進寓眠覺沈良相至郝焯寓  
門首辱罵劉成張六斤持鉄尺毆傷沈良相肩甲腿肚顙門等處越  
十二日殞命歷審不諱張六斤合依共毆人因而致死者以致命傷



爲重下手傷重者絞律擬絞監候秋後處決郝焯係考授縣丞應革去職銜合依原謀者不問共毆與否杖流律僉妻流三千里至配所折責四十板劉成合依餘人律杖一百折責四十板係僕加一等杖六十徒一年周佩顯王四潘桂枝成氏合依犯奸例枷號一個月責四十板但伊等事犯在康熙六十一年十一月二十日恩詔以前均應免罪成氏給伊夫嚴爾泰領回仍向張六斤名下追埋葬銀二十兩給付死者之家奉

旨依議

並非謀毆竟作原謀定擬

雍正十一年十月刑部會議覆長泰縣民王友等毆傷許舜身死一案據福撫趙 疏稱緣王友先同李太生夥開糖店彼此親暱嗣李太生另自開張王友於雍正十一年正月二十七日晚荷担出門買貨順途向李太生家索取公借錢一千文李太生外出適遇許舜在彼王友即將向李太生索欠情由告知許舜曾與李太生有姦因而袒護卽責王友不應討取兩相爭角許舜恃強毆打王友王友閃開拳毆許舜脊脊許舜復行向打王友情急卽取担內撥火鉢又還抵中傷許舜右手適有鄭質鄭海鄭贊經過鄭質見毆進勸許舜以爲袒護王友向打鄭質鄭質卽用拳毆許舜脊背時鄭海以許舜混打解勸之人遂與爭角亦打許舜左肱肘許舜回毆鄭海鄭質向阻被許舜推跌鄭贊亦拾王友丟棄鉢又毆打許舜左臙肘而散王友負



担奔回許舜又向趕失跌仆地被窩墊傷胸膛越七日殞命歷審不諱將王友擬絞監候李太生等擬以柳責等因具題應如該撫所題  
不同謀偶然觸念共毆未便以原謀定案  
 王友合依原謀共毆亦有致命傷以原謀為首律擬絞監候秋後處決該撫既稱李太生和同鷄姦應照男女相姦例柳號一個月杖一百年甫一十四歲應照律收贖鄭質鄭海鄭贊俱合依餘人律杖一百熱審減一等杖九十先行折責發落等語均無庸議奉  
 旨王友依擬應絞著監候秋後處決餘依議

原謀毆傷致命擬以絞抵

乾隆五年閏六月刑部會議覆莆田縣民吳伯申等致死劉天清一案據原署福撫王 疏稱緣吳伯申係開飯店營生劉天清陸續賒欠吳伯申飯錢一百七十三文又將吳伯申酒瓶私取當錢四十文吳伯申備錢令其取贖劉天清將錢花用併不贖還嗣即別往會根飯店就食吳伯申不甘欲毆劉天清洩忿乾隆四年六月初一日適有林九挑蟬貨賣前至吳伯申飯店吃飯吳伯申因素與熟識訴知前情邀林九同往助毆林九允從偕至會根店內吳伯申尋見劉天清喚天清出店向索錢瓶劉天清欲行再緩吳伯申不允互相罵詈劉天清扭住吳伯申胸前衣領吳伯申亦將劉天清褲腰揪住劉天清放手向毆吳伯申吳伯申揮拳毆傷劉天清胸膛跌倒擦傷右臂膊旋即爬起擒毆吳伯申林九從後用拳毆傷劉天清左後脇天清



傷重醫治不愈越二日殞命屢審不諱將吳伯申擬絞監候林九等擬杖等因具題應如所題吳伯申合依原謀共毆亦有致命傷以原謀爲首律擬絞監候秋後處決該署撫旣稱林九合依餘人律杖一百會根在場不行勸阻合依不應重律杖八十已經照例折責發落等語應毋庸議至劉天清所欠吳伯申飯錢酒瓶應照例免追奉

旨吳伯申依擬應絞着監候秋後處決餘依議

率衆毆人致死元謀亦有重傷擬流

乾隆元年九月刑部會看得番禺縣民黃亞國等毆傷南海縣民鄭子俊身死一案據廣撫楊 疏稱緣番禺縣民周應佳有南邑土名沙頭稅地一畝四分八厘鄭子俊族人鄭秀生係南海縣民有番邑土名蜆洲稅地一畝四分八厘彼此皆因異縣難於歸戶輸納兩相兌換管業嗣因蜆洲稅地逼近河旁被水冲隔周應佳將蜆洲之地補銀退還鄭秀生欲取沙頭原業詎鄭秀生仍行罷耕轉批與鄭子俊種植薯芋鄭秀生物故雍正十三年七月二十三日周應佳率同工人黃亞廣黃亞國黃亞嵩姪周永光各執鋤棍扁挑駕船至沙頭地方欲毀薯芋甫至地邊鄭子俊知覺持棍趕逐亞廣畏怯先走回船黃亞嵩亦欲趨避周應佳阻止鄭子俊奔至用棍向打黃亞嵩亞嵩持鋤柄格傷鄭子俊顛門子俊仰倒地欲行站起黃亞國將扁



挑戳傷鄭子俊臍壯子俊轉身周應佳用棍打鄭子俊左肋周永光持棍向打周應佳卽行攔阻各散回船鄭子俊傷重越二日殞命屢審不諱將黃亞國等擬絞流杖罪援免具題應如該撫所題黃亞國合依共毆人因而致死以致命傷爲重下手致命傷重律擬絞監候秋後處決周應佳率衆共毆亦有重傷合依元謀律僉妻流三千里至配所杖一百折責四十板黃亞嵩鋤柄打傷鄭子俊顛門雖係致命並非克器應與在場助毆未經傷人之周永光均合依餘人律杖一百折責四十板黃亞廣見毆先回不行勸阻合依不應重律杖八十折責三十板黃亞國所犯專在

赦前相應援免仍向黃亞國名下追埋葬銀二十兩付給屍親收領奉旨依議

原謀毆有致命傷擬抵

雍正十一年八月刑部會議覆信豐縣卞顯榮等毆傷賴國志身死一案據廣撫楊 疏稱緣雍正十年閏五月初八日賴國志挑鹽醃瘟死猪肉前往信邑神岡堡趁墟貨賣卞顯榮慮其傳染猪隻約同袁國兆往逐不許在墟貨賣并稱賴國志不依我們打他一頓之語袁國兆應允同卞顯榮至彼斥令賴國志將肉挑出墟外賴國志不服惡言肆罵卞顯榮卽將右掌向賴國志腮脰批去被國志接住其手不放卞顯榮急圖脫手隨用左拳一擊傷中賴國志右脇賴國志仍不放手袁國兆又用右拳毆中賴國志左脇當經會照成聞聲趕赴勸阻不及賴國志受傷伊妻趙氏扶掖回家越五日殞命歷審不諱查同謀共毆條律註原謀共毆亦有致命傷以原謀爲首等語卞顯榮糾約袁國兆共毆乃起意原謀亦有致命重傷將卞顯榮擬絞



監候袁國兆擬杖等因具題應如該撫所題卹顯榮合依鬪毆殺人律擬絞監候秋後處決該撫既稱袁國兆雖毆有致命重傷而無兇器合依餘人律杖一百折責四十板曾照成救阻不及先行釋放等語應毋庸議奉

旨卹顯榮依擬應絞着監候秋後處決餘依議

造意謀毆之人又有致命重傷依律問抵

乾隆三年十二月刑部會議覆揚陽縣民孫榮洲等毆傷陳其章身死一案據署廣撫王 䟽稱孫榮洲與陳其章各居城鄉緣孫榮洲借欠陳其章稻穀二石八斗銅錢七百文屢討無償乾隆二年七月丙陳其章令孫榮洲寫屋抵欠孫榮洲不允致受毆辱因而挾嫌八月初一日早孫榮洲見陳其章在鄉欲圖報復適隣人徐輝先從伊門首經過孫榮洲知其曾與陳其章因爭耕陳其章姪婦林氏田塘訐訟有隙告知被辱情由欲誘陳其章至家毆打洩忿澆其幫護徐輝先允邀弟兄相幫徐輝先卽約伊兄徐標先弟徐秀先姪徐石福徐阿妙同往幫毆孫榮洲亦令伊弟孫阿哲助力各皆應允午候孫榮洲佯誘陳其章至家假以欠數多寡爭鬧陳其章用扇頭先毆孫榮洲孫榮洲拳毆陳其章左腮頰比徐輝先徐石福徐阿妙聞鬧各




持械奔至陳其章罵其串同毆打徐輝先等遂環繞攢毆徐輝先將  
鉄尺毆打陳其章左肩甲左手腕共三傷徐石福將短木棍毆陳其  
章右肩甲右胎膊右肱腋共四傷徐阿妙將竹棍毆陳其章右後肋  
孫榮洲又用鉄箒柄毆陳其章偏左仆地陳其章猶支兩手架格口  
肆詈罵徐標先徐秀先孫阿哲各執木棍趕至徐標先毆陳其章左  
肱肘徐秀先毆陳其章右肱肘孫阿哲毆陳其章右臑脇各卽釋手  
時有隣人陳賢俊聞嚷往救陳其章已受傷倒地隨喚同陳其章工  
人林阿娘并陳益聚往載回家伊子陳阿發控縣驗傷押立保辜醫  
治不效越十一日殞命屢審各犯供認不諱查本案實係謀毆洩忿  
並非有意欲殺孫榮洲起意謀毆又毆傷陳其章致命偏左傷重將  
孫榮洲擬絞監候徐輝先擬軍徐石福徐阿妙徐標先徐秀先孫阿  
哲均擬杖等因具題應如該署撫所題孫榮洲合依同謀共毆人因

而致死以致命傷爲重下手致命傷重者絞律擬絞監候秋後處決  
徐輝先執持鉄尺聚衆傷人合依兇徒聚衆執持兇器傷人不分首  
從發邊衛永遠充軍例杖一百發邊衛永遠充軍仍照例加爲邊遠  
充軍僉妻發遣至配所折責四十板該署撫旣稱徐石福徐阿妙與  
徐標先徐秀先孫阿哲毆非致命亦無兇器合依餘人律均杖一百  
折責四十板時逢熱審減一等照例先行折責發落陳賢俊毆後始  
至應毋庸議孫榮洲所欠陳其章錢穀應於該犯家屬照追給領徐  
輝先等耕佃林氏田塘飭令退還林氏另召佃耕以息訟端等語均  
應如該署撫所議完結奉

旨孫榮洲依擬應絞着監候秋後處決餘依議 謹查開殺律云各兼人  
數多寡言徐輝先應照餘人問杖不得擬軍





原謀毆有致命傷以原謀問絞餘人亦毆有重傷但非兇器照律擬杖

雍正九年三月刑部會看得大興縣民藍大等毆傷董四身死一案據直督唐疏稱緣雍正八年正月十一日董四向藍大索飲不允隨即嚷打經藍大之親家張大為之處和十三日董四復向藍大索飲藍大懼其嚷鬧沽酒與飲復偕往廟上看戲藍大遇張大到廟告以董四又索飲并被欺侮不甘令張大煩人助毆出氣張大隨邀王起鳳馬士英李四等助毆均各允從詎是晚董四飲醉復至藍大家內脫下衣褲羞辱藍大之妻適藍大回家撞遇藍大氣忿向毆反被董四跌仆門外張大見非敵手隨拾棍助毆連傷董四右眼胞右眉并右太陽穴等處王起鳳等聞聲偕至馬士英拾木棍毆董四右手腕手背李四亦拾棍毆董四鼻準王起鳳用扁挑毆左膝肋董



四仆地皆罵藍大復用棗茨扎傷董四脊背腰眼等處董四傷重是  
 夜殞命歷審供認不諱將藍大等分別定擬具題應如該督所題藍  
 大合依原謀共毆亦有致命重傷以原謀為首律擬絞監候秋後處  
 決該督既稱張大王起鳳馬士英李口均照餘人律杖一百各折責  
 四十板已經發落毋庸議奉

旨依議

共毆人致死以原謀喝令人擬抵不論最後下手

康熙四十六年二月刑部會看得高計成等毆死孟可將一案據直  
 撫趙 審擬絞戍杖罪具題查康熙四十四年十一月十八日高計  
 成甥女創取孟可將地內蔓菁可將看見喝罵又報明地方計成聞  
 知即邀郝文竹同往理論互相角口當經孟選吉勸散可將心猶不  
 甘欲赴縣控理行至中途撞遇計成復行爭鬪計成即奪在傍陳二  
 小鉄鋤毆傷可將太陽等處復喝令郝文竹持磚毆兩腰眼可將傷  
 重當晚身死歷審情真高計成合依共毆人因而致死者以致命傷  
 為重下手者絞律擬絞監候秋後處決郝文竹合依共毆人執持充  
 器亦有致命傷痕律僉妻發邊衛克軍至配所杖一百折責四十板  
 妄報韓東曾在場同毆之鄉保郭三保合依不應重律杖八十折責  
 二十板段百宜獲日另結韓東會審係無干無庸議奉



旨高計成依議應絞着監候秋後處決餘依議

刑部會奏 卷一 三

聽從助毆之人亦有致命傷仍以傷重之原謀擬抵并菜刀并例  
載克器仍以亦論

乾隆六年七月刑部會議覆秀水縣民人朱廷相等致死徐秀臣一  
案先據浙撫盧 將童三依律擬斬監候原謀朱廷相擬軍孫彩弟  
朱四俞尚發均擬杖等因具題經臣部等衙門以律內原謀共毆亦  
有致命傷又以原謀為首等語今朱廷相欲圖洩忿糾約童三等商  
謀駕船往毆徐秀臣朱廷相刀割徐秀臣四傷俱係致命要害之處  
而童三雖刀戳徐秀臣胸膛致命一處並未即時身死童三亦不復  
持刀再戳仍同朱廷相等將徐秀臣攙扶上岸詳察情形尚非有意  
致死夾訊童三亦無臨時欲殺之供乃該撫將童三斷以頓起殺機  
候故殺律擬斬監候而遠將原謀共毆亦有致命重傷之朱廷相從  
輕擬軍情罪不符難成信讞應令該撫另行詳審按照律例妥擬具

刑部會奏 卷一 九人命 一百五十 聞毆及故殺人




題到日再議等因咨行去後今據該撫盧 疏稱緣朱廷相與弟朱  
四隨母改嫁與徐秀臣之兄徐公臣徐秀臣稱爲野種相待刻薄朱  
廷相弟兄在魚籬看守邀童三等往毆徐秀臣出氣各皆允從時已  
二更徐秀臣同次子徐永齡在於上塘其長子徐永祥在於下塘守  
籬朱廷相用木槳打傷徐永祥跌入河內徐秀臣聞子被打喊稱不  
船童三卽用秤錘擲擊徐秀臣跳過船內將童三擎咬朱廷相往救  
將鐵頭竹篙戳傷徐秀臣右眉稍上唇手背復用刀連剗徐秀臣頂  
心顙門偏左等處徐秀臣鬆手童三因其力大恐被毆死一時情急  
摸取菜刀戳傷徐秀臣胸膛倒入船內朱廷相與童三將徐秀臣扶  
上岸灘而散旋卽殞命臣復加研鞫據朱廷相童三將謀毆洩忿並  
無預謀致死情由供認不諱將朱廷相改擬絞監候童三擬軍等因  
具題應如該撫所題朱廷相依原謀共毆亦有致命傷以原謀爲首

律擬絞監候秋後處決再查律內刃傷人者杖八十徒二年又乾隆  
五年閏六月內三法司議覆臣部侍郎張照條奏內稱嗣後有重傷  
而無兇器者不得混引兇器之條除例載兇器外其餘器物俱以他  
物論等因題覆通行在案今童三刀戳徐秀臣胸膛雖有重傷但係  
摸取菜刀相戳並非例載兇器可比應仍以刃傷論童三不應如該  
撫所題依例擬軍應將童三改依刃傷人律徒二年至配所杖八十  
再該撫疏稱此案已經遵駁改正承審各官照例免議等語應毋庸  
議奉

旨朱廷相依擬應絞着監候秋後處決餘依議 查童三既不依有兇器  
有重傷律擬軍便應照餘人律滿杖今依刃傷律擬徒似未允愾





共毆人傷皆致命必傷痕輕重相等方以最後下手擬抵

康熙四十七年十月刑部會看得何連生等毆死張文興一案先據  
 江撫于準將何連生擬絞俞喜等擬以流杖具題臣部等衙門以俞  
 喜先毆文興右乳傷痕量長一寸三分連生復毆文興左肋傷痕量  
 長一寸二分兩人所毆之傷均屬致命而俞喜係元謀將連生擬絞  
 與律不符駁令該撫再行詳審定擬具題到日再議去後今據該撫  
 疏稱俞喜先毆文興右乳何連生復毆文興左肋兩傷均屬致命而  
 肋上尤為虛怯正與同謀共毆人傷皆致命以最後下手重者當其  
 重罪之律相符等因將何連生等仍照原擬具題何連生合依共毆  
 人因而致死者以致命傷為重最後下手傷重者絞律擬絞監候秋  
 後處決俞喜合依元謀律僉妻流三千里至配所折責四十板費壽  
 合依餘人律杖一百折責四十板奉



旨何連生依擬應絞着監候秋後處決餘依議

共毆傷人均有致命以先下手傷重者問抵

雍正九年五月刑部會看得蠡縣民王秀毆死魏福榮一案據直督唐疏稱緣雍正八年六月二十二日魏福榮往劉村趕集飲酒回家遺落錢文艸帽復至劉村尋覓混罵王秀理勸反被詬詈王秀不甘用拳毆其左右眼胞魏福榮仆地愈加辱罵王秀復拾魏福榮之鞋擊其臍腹適有與魏福榮素相頑耍之趙常德拉魏福榮不起意其詐賴復脚踢其後臀不意失足傷及腎囊隨後魏福榮叫喊肚疼越二日殞命歷審各供認不諱查魏福榮被毆之後止喊肚疼而不言腎痛其為毆傷臍肚身死無疑將王秀擬絞趙常德擬杖等因具題應如該督所題王秀合依共毆人因而致死以致命傷重者絞律擬絞監候秋後處決該督既稱趙常德合依餘人律杖一百折責四十板先行發落等語應毋庸議奉



旨依議

刑部議

卷十九

七

先下手傷重後下手傷輕以後下手者擬抵未協

雍正十一年四月刑部議覆署陝撫史 疏稱緣沈生才邀同蒙國  
珍往周濟泰店內飲酒適韓福陽劉忠李孝袁四郭伯林等先已在  
彼共飲沈生才遂招郭伯林共席言及賃舖一事墮郭伯林別賃於  
人手執小刀向郭伯林詈罵劉忠聲言奪刀韓福陽向奪沈生才忿  
怒扎傷韓福陽右手韓福陽情急拾木棒槌擊傷沈生才右額角左  
脇等處詎劉興自外而至見沈生才持刀叫罵恐其扎人隨拾鉄臉  
盆連擊沈生才腦後次日殞命歷審不諱將劉興擬絞韓福陽擬軍  
蒙國珍等擬杖等因具題查律內共毆人因而至死者以致命傷爲  
重下手傷重者絞等語今韓福陽將沈生才額角左脇脊背腰眼等  
處毆打重傷均係致命而腰眼一傷青色又屬傷中最重劉興所毆  
雖有腦後致命重傷痕二處止於皮破尚未傷骨似於最後下手傷




重者有開事關人命不便率結應令該署撫另委賢員將劉興韓福陽毆打沈生才身死之處再加確審究明何傷致死務得實情按律妥議具題到日再議奉

旨依議 謹查韓福打傷沈生才右額角左脇雖係致命木棒槌並非兇器未便擬軍

頂心偏左傷色分寸相等以傷本位者問抵尾追兩人中途轉身人不回顧涉水淹斃照威逼二命例裁等

乾隆六年六月刑部會議覆龍溪縣民莊閏等毆傷楊篆身死并莊悻等毆逼楊躍楊誦涉水溺死一案先據署福撫王 疏稱緣莊閏族叔祖莊悻新佃黃姓田畝其田向係楊添佃耕乾隆四年三月十五日夜楊添之子楊顯將莊悻田岸掘壞十六日早莊悻偕弟莊放前往巡田因見水涸苗乾莊悻即掘放隣田楊軍之水以灌已田仍欲車灌別坵田畝楊軍族人楊篆楊躍楊誦各在田間見而向前阻較打破莊悻水車莊放隨拾車棋毆楊篆顛門左邊而逸時莊閏挑秧經過楊篆見係莊放族人即用扁挑向毆莊閏亦將秧挑回毆中傷楊篆頂心復有在田耕作及經過之莊旺莊躍莊煥亦各持扁挑車棋助毆莊旺毆傷楊篆頂心偏左莊耀戳傷楊篆左腿莊煥戳傷





楊篆左胸厥倒地莊悻拾港邊船內竹篙迎戳楊躍左額頰楊誦正欲幫毆值隔田之莊皮莊讓莊愿望見奔護莊悻卽持竹篙向前趕打楊躍楊誦被趕情急涉港逃避莊悻回身見楊篆在地肆詈亦以竹篙戳楊篆穀道楊顯時亦在田見毆驚懼先就小港涉水奔逸而楊躍楊誦適遇潮漲俱各淹斃楊篆傷重經伊甥陳飲赴彼背回越三日殞命屢審供認不諱查莊閩等實因爭水互毆釀起一時訊無主使而已死楊篆楊躍楊誦乃係疎族各居是日各在已田耕作並非一家查莊放先以車輿毆傷楊篆顛門左邊莊閩亦將秧挑回打楊篆頂心居中莊旺用扁挑打傷楊篆頂心偏左均屬致命越三日身死訊因頂心居中傷重致斃應將莊閩依共毆人傷皆致命當時未死而過後死者當究明何傷致死以傷重者坐罪律擬絞監候并聲明例載因事威逼人致死一家二命及非一家但至三命以上者

發邊衛充軍係指一家二命及非一家三命以上而言又例載因事用強毆打威逼人致死果有致命重傷雖有自盡實跡發邊衛充軍係指威逼毆有致命傷而言今莊悻只傷楊躍額頰係不致命楊誦並未被毆兩人俱因涉水逃避適遇潮漲溺斃楊躍楊誦又係疎族各居並非一家但因莊悻逼逐以致涉水溺斃二命律無正條除莊悻以竹篙戳傷楊篆輕罪不議外應比照威逼人致死一家二命發邊衛充軍例減一等擬徒請

占定奪莊放等分別擬杖等因具題經臣部等衙門以律載共毆人以致命傷爲重同有致命傷以後下手爲重又律註當時未死而過後身死者當究明何傷致死以傷重者坐罪等語是必致命之傷實有重於他傷之處確切可指更無疑義然後可據此科斷今楊篆頂心居中一傷深見骨紫紅色長一寸寬三分頂心偏左一傷深見骨紫紅



色長一尺寬三分二傷既皆致命且俱深見骨紫紅色傷之分寸又各相等該承審官祇以屍弟楊輝供稱伊兄楊篆頂心居中之傷喊痛難過一語遂坐次下手之莊閩而寬後下手之莊旺楊篆已死不能起九原而問楊輝是否嫁禍抑或賄脫均難憑信再查定例威逼人致死一家二命及非一家但至三命以上者發邊衛充軍蓋因其人雖由威逼致死究係輕生自盡故坐軍罪今楊躍楊誦因莊悻趕毆不得已涉水逃避竟鋒以致淹斃並非輕生自盡者比未便將該犯比照威逼致死一家二命例擬軍又請減為杖徒事關人命殊難草率定議應令該撫將此案另行按律妄擬具題到日再議等因題駁去後今據署撫王 疏稱查楊篆受傷回家告知楊輝止統言被莊悻等打傷原未指明何傷係何人所毆即從前縣審楊輝照伊兄言供報在先莊閩打傷楊篆頂心供認在後楊篆頂心一傷是否莊

閩所毆楊輝尚無從查覺似難嫁禍於莊閩至於受賄開脫楊輝莊旺供無其事即莊閩亦毫無見聞指証尤難懸坐查偏左偏右止因在頂心兩旁故爲要害則頂心居中其爲要害更甚明矣今楊篆之頂心及偏左均被毆傷若使偏左一傷深色分寸過於頂心而在最後下手則雖過後方死猶或可以偏左傷重以毆傷偏左者攔抵今兩傷深色分寸相等又死非當時照律究明何傷爲重則中偏之分似未便輕頂心之本位而重本位之兩旁矣况楊篆實有頂心最痛之語楊輝及醫生蔡木口供鑿鑿其爲頂心受傷最重無疑莊閩應請仍照共毆人傷皆致命以傷重坐罪律擬絞監候再楊躍楊誦住家港南所種之田皆在港北別無他路可通止有涉港而過當日楊躍楊誦急欲歸家勢必涉水而往原非全因莊悻追趕而後過港况莊悻追逐尚隔有三十餘步因楊躍等疾行已遠諒難追及即



同莊皮等轉身斯時在莊悻實無不可當之克鋒在楊躍等亦無不得已之情勢似難坐莊悻以趕毆逼溺之罪但楊躍楊誦雖非被逼不堪涉水致斃然究因莊皮等三人一時齊至莊悻又與莊皮等先後尾追以致心慌不及回顧莊悻已經轉身急急涉港歸家遇潮陡漲均被淹死合之伯仁由我之義莊悻亦難辭咎但律例內查無追至半途回家而被追之人涉水淹斃治罪正條莊悻改依鬪殺擬絞律減一等擬流請

旨定奪莊放等分別擬杖等因具題應如該署撫所題莊閏合依共毆人傷皆致命當時未死而過後死者究明何傷致死以傷重者坐罪律擬絞監候秋後處決至莊悻毆逼楊躍楊誦涉水溺斃之處細閱情形似因被毆不得已涉水逃避克鋒以致淹斃是以臣部等衙門原令另行查勘今既據該署撫聲明楊躍等住居港南種田港北

別無他路止可涉港時因莊悻等先後尾追楊躍等向前疾行莊悻見已奔遠隨即轉身不追楊躍等並不回顧陡遇潮漲淹斃等語則當時莊悻原無兇狠逼死之心該署撫改擬依鬪殺減流似覺過重應將莊悻仍照原擬威逼人致死一家二命發邊衛充軍例減一等徒三年至配所杖一百折責四十板仍遵照雍正十一年大學士張一條奏律例無可引用援引某律某例比附加減例請

旨定奪如蒙

俞允仍向莊悻名下依律追埋葬銀一十兩給付楊躍楊誦各屍親收領該署撫既稱莊放莊旺莊耀莊煥莊皮莊讓莊愿均合依餘人律各杖一百起釁之場顯合依不應重律杖八十俱照例先行折責發落等語應無庸議再該署撫疏稱此案莊悻情罪律無正條從前比引未協業經遵駁改正例得均邀免議等語今楊躍等溺死之由疏內



既已詳細分晰臣等仍照前擬應將該署撫所稱遵駁改正請邀免議之處無庸議奉

旨莊閏依擬應絞著監候秋後處決餘依議

毆急逃遁入河溺斃亦以後下手者擬抵

雍正十一年九月刑部議覆蘇撫喬 疏稱雍正十年六月十九日姚魁與弟姚加在田畊水姚魁之兄姚壽在岸拔草適吳仁買猪一口同陳明抬回姚壽問其猪價吳仁未曾回答姚壽輒肆詈罵吳仁不甘將猪放下欲毆姚壽姚魁姚加恐兄被打俱即赴救姚加先以挑泥扁担打傷吳仁顛門姚魁亦拳毆吳仁心坎陳明向前拉勸將姚加扁担奪落姚加又用拳毆吳仁左眼左肋姚魁又拳毆吳仁右乳左後肋吳仁被毆情急躲入河內不期河水深濶旋即溺死經屍弟吳永控縣歷審不諱除姚壽于取供後在家病故不議外姚魁係最後毆打吳仁落河身死應擬絞候姚加雖毆有致命重傷但扁担與兇器有間擬杖先行折責等因具題姚魁合依共毆人傷皆致命以最後下手者當其重罪律擬絞監候姚加依餘人律杖一百已經



發落毋庸議奉

旨依議

傷皆致命以傷重者擬抵及鑲鐵尖挑原係農具不作兇器

乾隆四年九月刑部會議覆晉江縣民謝伏等致死無服族嫂蔡氏一案據署福撫王疏稱緣乾隆二年十一月二十二日夜謝伏地瓜被人偷挖疑係謝俊兄弟曾向謝俊索賠不允至乾隆三年二月三十日謝俊偕弟謝天在屋後山上種豆謝伏攜帶鋤頭同堂兄謝騰挑糞赴山灌田彼此相遇謝伏復向謝俊索賠爭角謝伏拾磁片擲傷謝俊右額角謝騰亦用扁挑毆傷謝俊右後肋謝俊跌地謝天亦拾石塊擲傷謝騰額顛當經謝團勸開謝伏見謝俊受傷携鋤跑走時謝俊之妻蔡氏聞鬧奔護甫至路口遇見謝伏蔡氏向扭謝伏以鋤柄打蔡氏左臂膊蔡氏又向前趕扭謝伏急圖脫身又以鋤背打蔡氏左額角骨損倒地而逸謝天趕至正扶蔡氏適謝騰之弟謝默聞聲執持鑲鐵尖挑趨護謝天見而詈罵謝默用尖挑向戳謝天



謝天閃開謝默誤戳蔡氏腰眼亦卽奔遁謝國奔救不及將蔡氏扶  
回次日殞命屢審供認不諱將謝伏擬絞監候謝默等分別答杖等  
因其題查該署撫疏稱蔡氏被毆左額角腰眼二傷皆係致命越日  
身死應以傷重者坐罪今謝默以尖挑戳傷蔡氏致命腰眼圍圓舒  
直只一寸二分深四分謝伏用鋤背打傷蔡氏致命左額角圍圓舒  
直四寸五分深至骨損是蔡氏實由左額角重傷致死等語應如該  
署撫所題謝伏令依共毆人傷皆致命當時未死而過後死者究明  
何傷致死以傷重者坐罪律擬絞監候秋後處決該署撫旣稱謝默  
所執鑲鐵尖挑查係農具並非鎗刀兇器合依餘人律杖一百謝騰  
用扁擔打傷謝俊謝天拾石擲傷謝騰傷俱平復均合依他物毆人  
成傷律各笞四十時遇熱審將笞犯謝騰謝天照例寬免杖犯謝默  
照例減一等先行折責發落謝國趕救不及應予免議謝伏地小被

人偷挖飭查另結等語應均如該署撫所議完結奉

旨謝伏依擬應絞著監候秋後處決餘依議



傷皆致命傷重者批

乾隆六年三月刑部會議覆同安縣民倪敬等毆傷黃燦身死一案  
據署福撫王 疏稱緣乾隆四年八月二十日午後大雨倪敬之兄  
倪捷開坐林翰店內見有水流糞草堆積街中隨取窓枋兩塊在土  
城門邊闌住堵水欲俟水滿浮起糞草抽枋放流因水湧勢急糞草  
連窓枋冲入下首黃老店內黃老同子黃燦趕與倪捷爭論黃燦抓  
傷倪捷之面倪捷用拳回毆黃燦胸膛當經林翰勸散倪捷趨避適倪敬  
老店中拾取窓枋黃燦復與倪捷爭角欲毆倪捷倪捷趨避適倪敬  
出巷見而奔護黃燦卽持竹槓出店迎打倪敬倪敬奪槓還毆中傷  
黃燦顛門偏右倒地并擦傷左膝至膝胸二處林翰奔勸不及經黃  
老扶回次早殞命屢審供認不諱查黃燦先被倪捷毆傷胸膛尚能  
自行歸店後又能與倪捷爭角自被倪敬毆傷顛門偏右立時倒地



不起經伊父黃老扶回醫治不愈斃命且以兩傷比較額門偏右之傷大一分其色又係紫紅重於胸膈青色應將倪敬擬絞監候倪捷擬杖等因具題應如該署撫所題倪敬合依共毆人傷皆致命以最後下手重者當其重罪律擬絞監候秋後處決該署撫既稱倪捷合依餘人律杖一百照例先行折責發落倪捷訊未到場幫毆林翰勸放不及應與控詞失實施卽供明之屍父黃老均予免議等語應均無庸議奉

旨倪敬依擬應絞著監候秋後處決餘依議

批駁响膾跌磕肚腹以後下手致跌者問抵

雍正七年四月刑部會議覆新安縣民曾進弟等毆傷陳上賢身死一案據署廣撫傅 疏稱緣雍正六年正月十六日陳上賢之族叔陳國昇有牛牯一隻與曾起潛犍牛俱放牧塢中牛牯跟隨犍牛而走曾欽舉在塢工作看見捉獲欲圖盜賣適遇曾亞九携回交其帶回曾起潛遇見謂係伊犍牛引來牽入屋內拴匿曾欽舉商令曾起潛於十八日牽往常平墟賣錢三千一百文尚未分用陳國昇聞伊牛牯爲曾亞九所牽於二十日往塢探看罵及曾姓牽藏伊牛適有曾進弟同曾亞珠自墟回家遂與陳國昇爭論陳上賢在塢鋤薯見嚷幫護致相爭罵陳上賢卽於寮內取出看著竹槍戳傷曾亞珠右腿亞珠將賣肉尖刀撇去傷及上賢左腿適曾二保奔救用竹篙戳傷上賢胸膈陳上賢又復趕戳曾進弟曾進弟隨用鉄嘴扁挑戳傷



陳上賢右肋左腿陳上賢仆跌磕傷右肚腹上賢之弟陳上正聞聲  
 奔至見兄上賢傷倒拾起上賢所擲竹槍戳傷曾亞珠臂腿倒地陳  
 上賢傷重即時畢命曾亞珠傷經平復歷審各認不諱將曾進弟等  
 擬以絞杖具題應如該撫所題曾進弟合依共毆人傷皆致命以最  
 後下手重者當其重罪律擬絞監候秋後處決曾二保曾亞珠均合  
 依餘人律杖一百折責四十板曾欽舉合依盜牛一隻者枷號一個  
 月杖八十例枷號一個月杖八十折責三十板為從之曾起潛曾亞  
 九應減一等俱枷號二十五日各折責二十五板該撫既稱曾欽舉  
 等盜陳國昇之牛係因其自來與有心往竊者不同應免刺等語曾  
 欽舉等應俱免其刺字其用竹槍戳傷曾亞珠之陳上正該撫既稱  
 係見兄陳上賢傷重情切亞珠傷經平復應邀免議等語應毋庸議  
 曾起潛所賣牛錢三千一百文給陳國昇收領奉

旨曾進弟依擬應絞着監候秋後處決餘依議



以先下手并傷少者問抵與例不符

乾隆二年十二月刑部議覆王天忠等毆傷無服族姪王元身死一案據晉撫石 疏稱緣該村向有龍王廟春秋祈報乾隆元年輪值王天忠之父王鳳經官齎錢獻戲王鳳欲按地十畝出錢十文王元之弟王禹議以每地十畝出錢九文王鳳不允兩人爭毆王鳳手扳王禹之面王禹亦拳毆王鳳眼角適王天忠在旁詈罵王元隨持石打傷王天忠額顛王天忠奪石還擊適傷王元右太陽穴右耳輪耳垂及耳根王元倒地復起拾石又擲王天忠亦拾石打去傷及王元唇吻並折二門牙王元之子王有仁拾石擲王天忠右額角王天忠倒地王天忠之兄王天新聞聲奔救拾石毆傷王元腦後正中及左右倒地王天忠傷輕平復王元傷重至二更殞命屢審不諱將王天忠擬絞監候等因具題經臣部等以該撫將先下手致命傷二處之



王天忠擬絞而以後下手致命傷三處之王天新擬杖未協題駁去後今據該撫疏稱王元並非立斃當時應究明何傷致死非僅以下手先後計也王天忠王天新所毆之傷雖多寡不同但王天忠用石一下連傷太陽耳垂耳輪耳根四處其石不為不大耳輪打斷其勢不為不重未便止以傷之多寡論也至於太陽一穴尤為要害故王元被打太陽頂曾經跌倒屍屬王有仁等均稱王元只是手按著太陽說疼得受不得等語此非傷重之明驗乎仍將王天忠擬絞王天新等擬杖等因具題查律內共毆人傷皆致命若當時未死而過後死者當究明何傷致死以傷重者坐罪等語王天忠毆傷王元左太陽耳根二處王天新毆傷王元正中腦後偏左偏右三處傷痕之輕重先後開載甚明乃該撫以王天忠擬抵於律未協經臣部等衙門題駁去後今該撫疏稱屍屬王有仁等均稱王元只是按著太陽說

疼得受不得一語仍以王天忠擬抵夫王元既能按著太陽是太陽之骨尚屬未損如果傷至骨損必致觸手難忍焉能用手扶按乎况屍屬所供均稱見王元腦後滴血擡到坑上血流不止就死了並無王元按著太陽說疼得受不得等語是王元之死由於腦後三傷而非死於太陽之兩傷明矣乃於駁審之後忽增入王元手按著太陽說疼得受不得等供前後不符至疏稱傷之重輕惟行兇人自知之等語夫王天忠果然識其致命處所用石狠擊斃命便係有心欲殺而非可以共毆論矣且王元被傷太陽倒地之後尚能復起拾石還擲及被傷腦後倒地遂不復起是腦後之傷更重於太陽可知若使太陽傷經骨損命在須臾又豈能起拾石還擲乎種種不符難成信讞應仍合該撫詳審妥擬具題到日再議奉

旨部駁甚是依議



共毆人致死不論致命不致命以傷重擬抵

康熙四十六年十一月刑部會看得烏程縣耿惠公等毆死吳成之  
一案先據護浙撫武國楹疏稱緣朱彥英山上桃樹被人砍伐卽勒  
朱元琛指扳吳成之等同砍成之隨與理論角口康熙四十五年七  
月初一日成之撞遇彥英互相毆打彥英聲喊有張國祥耿惠公聞  
知出視張國祥執棍先毆成之太陽惠公棍毆成之肱肘臙肘骨折  
嚴三才棍毆成之臀膝成之傷重至十四日殞命歷審情真將耿惠  
公等擬以絞戍杖罪具題臣部等衙門以毆傷太陽致命之張國祥  
擬軍毆傷肱肘臙肘非致命之耿惠公擬絞與律不符行令確審定  
擬具題去後今據浙撫王 疏稱張國祥棍毆成之太陽雖屬致命  
僅止皮破傷輕耿惠公棍毆成之肱肘臙肘骨折傷重耿惠公等仍  
照前擬等因具題耿惠公合依共毆人因而致死下手傷重者絞律



擬絞監候秋後處決張國祥合依共毆之人執持兇器亦有致命傷痕律僉妻發邊衛克軍至配所杖一百折責四十板朱彥英嚴三才俱合依餘人律杖一百各折責四十板奉旨耿惠公依擬應絞着監候秋後處決餘依議

共毆人致死以傷重者擬抵

康熙五十九年三月刑部會看得湯德甫致死張廷偉一案據浙撫朱 䟽稱緣湯張兩姓山界相連于康熙五十八年三月內因砍柴兩相爭鬧湯子原拾石打張廷偉腰眼湯德甫持鎗趕戮張廷偉右眼等處一時畢命將湯德甫擬絞湯子原擬杖等因具題查該撫䟽稱湯子原石擊張廷偉腰眼雖係致命尚能奔走德甫鎗戮廷偉肘腕雖非致命但因血管戳斷流血不止以致斃命應如該撫所題將湯德甫擬絞監候秋後處決湯子原合依餘人律杖一百折責四十板奉

旨依議



致命傷輕不致命傷重以傷不致命者問抵并失察壓錢例無處

分

乾隆五年十月刑部會議覆霞浦縣民卓惟成等毆傷陳允中身死一案先據署福撫王 疏稱緣陳允中住居閩縣陳頭地方伊子陳長長向在霞浦縣斗米灣肩挑度活乾隆三年正月十六日陳長長與陳得教偶在山上壓錢頑耍陳長長輸錢六文欲行奪回致相爭毆陳允中間知於二十六日至彼與陳得教較論欲行控告經卓惟成代為勸處令陳得教出錢三百文給與陳允中為盤費時陳得教無錢卓惟成代認未給至二月初二日晚陳允中至卓惟成家邀其同往陳得教寮中索錢陳得教復行告寬陳允中不依即用頭撞陳得教陳得教拾寮邊竹尖挑戳傷陳允中右耳邊跌倒石上磕傷額角陳允中爬起遷怒卓惟成詈其哄騙勸處錢文欲與卓惟成拚



命卽將卓惟成擒扭不放卓惟成情急適見寮邊有一木棍隨手拾起毆去希圖脫身不期傷及陳允中左臙朋骨斷倒地逾時殞命卓惟成驚懼卽與陳得教將屍擡棄井中冀作跌死而逸次早有幼童揚模模往井汲水窺見井中有屍驚喊陳長趨視認係父屍未知被何人致死奔投地保報縣訪獲卓惟成等到案屢審供認不諱除卓惟成棄屍不失輕罪不議外將卓惟成擬絞陳得教等擬以徒杖等因具題經臣部等衙門以律載共毆人因而致死者以致命傷爲重下手致命傷重者絞又例載一人獨毆人致死無論致命不致命皆擬抵償兩人共毆人致死則以致命論抵等語從未有置致命之傷於不言而以不致命之傷當其重罪者也此案陳允中偕卓惟成向陳得教索錢不與兩相爭角陳得教以尖挑戳陳允中耳邊倒地殞傷致命右額角陳允中怒卓惟成夥同騙誘拚起扭結卓惟成卓

惟成隨用木棍打其不致命左臙朋骨斷逾時殞命遂以致死之由在臙朋而不在額角是致命及輕於不致命矣若謂卓惟成係最後下手不思律稱後下手者當其重罪乃以同有致命傷而言非致命與不致命並論也若謂額角雖致命而傷輕臙朋雖不致命而傷重亦應詳晰聲明方成信讞不得增減律文致滋朦混再臣部題定屍格於左右兩耳有耳竅耳輪耳根耳垂諸處分別致命不致命甚明今驗報耳邊一痕是否卽係耳根抑係耳輪若係耳輪不應一戳便致倒地若係耳根輕重懸殊難容含混且屍旣拋棄井中次早方行撈起則腹肚有無膨脹手足有無泥沙其爲死後入井或係帶傷入井之處最爲緊要關鍵驗時何以一字未及種種疑竇人命至重殊難率結應合該署撫細核案情秉公按律妥擬具題到日再議等因題駁去後今據署福撫德 疏稱查得陳得教先戳傷陳允中不致



命右耳輪囚陳允中將身一閃踏空跌倒磕傷額角雖屬致命但止  
 長五分寬四分紫紅色原屬傷輕故當時即能爬起與卓惟成拚命  
 後被卓惟成棍毆臙骨斷倒地不能動身旋即身死是臙骨雖係  
 不致命之處而毆致骨斷受傷甚重因而致死已無疑義其原驗屍  
 傷將不致命右耳輪誤報不致命右耳邊實係作照依鄉談喝報  
 致與屍圖所載不符並非致命耳根至陳允中身屍實係死後棄井  
 並非帶傷入井淹斃已據各犯供認確鑿原驗屍傷肚腹並無膨脹  
 手足亦無泥沙業將屍格俱填無故並據作王順喝報屍傷委係  
 生前被傷身死移屍井中屍圖開明可據實無疑實應仍照原擬卓  
 惟成擬絞監候陳得教等分別徒杖等因具題除卓惟成棄屍不失  
 輕罪及陳得教以尖挑戳傷陳允中右耳輪并與陳長長壓錢各輕  
 罪均不議外應將該署撫所題卓惟成合依共毆人因而致死者以

下手傷重者絞律擬絞監候秋後處決陳得教合依棄屍不失為從  
 減一等律徒二年半至配所杖九十折責二十五板該署撫既稱陳  
 長長壓錢起釁合依違

制律杖一百前經照例先行折責發落應免重科原驗之件作王順將右  
 耳輪屍傷照鄉談誤報右耳邊殊屬疎忽應照不應輕律笞四十時  
 逢熟審照例寬免仍於陳得教名下追出壓贏錢六文入官等語應  
 均如該署撫所議完結再該署撫疏稱壓錢並無賄具失察職名應  
 請免開其任聽作將右耳輪屍傷誤報右耳邊之前任霞浦縣知  
 縣陳策已經別案叅革應毋庸議等語查賭博例內並無失察壓錢  
 議處之條應免其查議至任聽作將陳允中右耳輪屍傷誤報右  
 耳邊之前任霞浦縣知縣陳策已經休致應毋庸議奉

旨卓惟成依擬應絞著監候秋後處決餘依議



致命傷輕不致命傷重以傷不致命者問抵

雍正八年七月刑部會議覆安溪縣民傅世等致死楊政一案據福撫劉 疏稱緣楊政於雍正七年正月十八日同族人楊協等往黃口宮穀神廟祈保年豐而回路經葉家鄉村踐踏田麥適有幼孩喊叫以爲羊食其麥楊政疑爲故意指姓詈人欲行擒毆葉懷向前攔阻楊政遂用拳打葉懷葉懷揮拳還毆楊政胸膛心坎二下楊協赴護詈葉懷時傅世泊船溪邊聞嚷往看向勸奪住楊協所執旗鏢楊政又趕打傅世傅世卽以所奪旗鏢回毆傷其右膀倒地是夜殞命歷審各認不諱查葉懷拳打楊政胸膛心坎雖係致命傷僅小點色止紫紅微紅受傷本輕傅世鏢傷楊政右膀雖係不致命但斜透腸臟深至四寸五分其傷甚重將傅世擬絞葉懷楊協楊勝楊具楊日擬杖等因具題應如該撫所題傅世合依共毆人因而致死以致



命傷為重下手傷重者律擬絞監候秋後處決葉懷合依餘人律杖一百起釁之楊協楊勝楊昇楊日俱合依不應重律杖八十時遇熱審應各減一等該撫既稱照例先行折責發落應無庸議奉旨傳世依擬應絞着監候秋後處決餘依議

致命傷輕於不致命以不致命者問抵

乾隆四年七月刑部會議覆陳槩等共毆鄭雙身死及張佳等誣叅革舉人陳心一銀兩一案據閩督郝 疏稱緣鄭雙陳心一等祖墳山界相連陳槩鄭雙園地毗連陳心一同叔陳元宗陳佳往墳獻紙因界牌斜倒令陳槩埋固鄭雙鄭小以為侵界當經理論而散陳槩自赴北園割麥鄭雙誤聽幼孩妄報疑為挾嫌竊取即持竹帚往阻適陳槩堂兄陳鼎途遇爭角彼此推扯致帚柄撞傷鄭雙右乳右膝鄭雙將帚用力推去致帚刺傷陳鼎右眼珠陳鼎之兄陳慥赴救鄭雙用帚向打陳慥陳慥奪過竹帚還毆致傷鄭雙左額角左眉上左眼胞下右腮夾右領額胸膛右膀上陳槩奔援鄭雙拾石拋傷陳槩額顛陳槩用木棍抵傷鄭雙右膀鄭雙向奪陳槩將棍戳傷鄭雙右眼胞傷透入內殞命詎蓋番張佳遇見陳心一聞因命案牽連



謊稱有碍功名須囑知縣馮永振鄉親陳池求情開釋陳心一懼罪應允交給銀四十兩張佳得銀二十兩將銀二十四兩轉交陳池收受陳池尚未進署說情旋經惠安縣馮永振訪聞檢舉通報飭究屢審不諱查陳鼎撞傷鄭雙右乳陳慥戳傷鄭雙額角胸膛雖俱係致命但原驗鄭雙右乳圍圓只舒直一寸訊係帶柄撞傷帶柄中空並非重器額角胸膛俱只皮破一小顆各傷屬輕陳槩棍傷鄭雙右眼胞雖係不致命但原驗圍圓舒直三寸二分透入眼睛黑色傷既透入卽及於腦其傷最重將陳槩擬絞監候張佳陳池陳鼎陳慥均擬杖分別援免等因具題查律載共毆人因而致死者以致命傷爲重又律註云共毆人傷皆致命以最後下手重者當其重罪如當時身死則坐後下手者無疑若當時未死而過後死者當究明何傷致死以傷重者坐罪等語皆指致命而言然亦有致命傷輕不至於死不

致命傷重竟至於死者而律文不載誠恐開遷就之端滋出入之弊也遇此等案件務須確審致命不致命之傷輕重懸殊或致命之傷已經平復而不致命之傷尚未平復於辜限內身死方可擬爲信案今鄭雙致命傷三不致命傷七其致命之胸膛額角二處不致命之左肩等六處傷皆細碎惟致命右乳一傷舒直圍圓一寸紫黑色不致命右眼胞一傷舒直圍圓三寸二分黑色以圍圓三寸二分之傷較圍圓一寸之傷則三寸二分爲重以右眼胞較之右乳則右眼胞爲輕若云傷既透入眼內卽及於腦此臆度之詞何足爲據况陳槩現請留養其中不無巧爲開脫等事關命案不便草率應令該督逐加詳審按律妥擬具題到日再議可也奉

旨依議 乾隆五年五月刑部會議覆惠安縣民陳槩等共毆鄭雙身死及張佳等誣騙叅革舉人陳心一銀兩一案先據閩督郝 審擬具



題經臣部等衙門核明題駁去後今據該督疏稱查陳鼎用竹帚柄撞傷鄭雙右乳圍圓一寸雖係致命之處但竹柄中空實屬輕器傷在皮膚並非重傷陳槩用木棍戳傷鄭雙右眼胞圍圓三寸二分雖係不致命之處但木棍較重於竹柄分寸兩倍於右乳圍圓既大透入自深傷及於腦勢所必至况鄭雙右乳被傷之後猶能戳傷陳鼎又與陳慥相毆而陳槩戳傷鄭雙右眼胞係屬最後且當卽倒地醫生作僉供右眼胞實屬傷重是鄭雙之死實為右眼胞傷重所致無疑將陳槩仍照原擬絞監候伊父陳睿已經身故無庸更請留養陳鼎等均擬杖分別援免 等因具題應如該督所題陳槩合依共毆人當時未死而過後死者當究明何傷致死以傷重坐罪律擬絞監候秋後處決該督既稱陳鼎陳慥均應照餘人律杖一百張佳明知陳心一係牽連無辜指使行賄誑銀入已串通陳池求情張佳

應照誑騙人財物准竊盜論律并贓四十兩杖一百陳池係聽從得贓應照為從減一等律杖九十陳鼎陳慥俱事犯在乾隆二年四月十六日

恩赦以前均應予援免張佳陳池詐贓犯在

赦後照例先行折責發落張佳仍革役陳池解回原籍安插陳心一陳佳先與鄭雙爭論山場並無角閘情事嗣鄭雙與陳槩等係因割麥起鬩角毆受傷身死與互爭山場無涉陳心一等亦無在場幫護其陳心一出銀之處實係一時被騙並非有意行求應同陳元陳佳均予免議等語均應如該督所議完結再該督疏稱舉人陳心一生員陳元審明無干均請開復失察鄉親書役犯贓職名係前惠安縣知縣馮永振但該縣已經查訪檢舉應否免議聽候部議等語查陳心一陳元雖始與鄭雙爭論山場但後無角閘情事陳心一所出銀兩係



張佳恐嚇索詐畏累聽從該督既經審明無干應如所請將陳心一所革舉人陳元所革生員均准予開復至前任惠安縣知縣今調古田縣知縣馮永振失察鄉親書役犯贓之處既經自行查訪檢舉應毋庸議奉

旨陳槩依擬應統着監候秋後處決餘依議

戮死人命以傷致命者擬抵

乾隆五年七月刑部會議覆詔安縣民楊炳等致死賴益興并楊志興致死賴特常一案據福撫王 疏稱楊炳與賴益興并楊志興與賴特常同居一村緣乾隆四年七月初六日有賴皇極耕牛牧放在山走失遍尋未獲賴皇極以村內僅與楊姓同居疑為楊姓所竊併疑其必乘夜深牽藏他處隨於初八日夜遣姪賴益興賴特常前往偵捕三更時分賴益興等攜帶竹鎗伏於楊姓祠前偵守適楊省方在祠看守烟葉聽聞門外响動心疑為賊隨携鐵裹尖挑出視見有二人伏於祠前即行喊擒賴益興賴特常即聲言楊姓偷宰其牛是以在此巡看致相爭角賴益興以鎗向戮楊省方用尖挑抵格戮傷賴益興右膀賴益興回戮楊省方左胎膊轉身欲走楊省方復以尖挑還戮賴益興左腿肚賴益興復戮楊省方左乳倒地時楊省方弟



侄楊炳楊志興聞喊先後各帶鐵頭竹鎗趕至楊炳見叔楊省方被其戳倒隨以鎗戳賴益興石後脇賴益興轉身向戳楊炳又戳其額顱及肚腹倒地楊志興撞遇賴特常即以鎗戳楊志興楊志興亦用鎗還戳賴特常左腿肚腹二處倒地楊炳與楊志興遂將楊省方扶回賴益興之子賴定賴特常之兄賴一聞嚷亦即奔至將賴益興賴特常扶歸賴益興傷重是夜即斃賴特常越二日殞命屢審供認不韓查賴益興先被楊省方戳傷右胯左腿肚二處並非致命而楊炳向護後戳賴益興後脇額顱肚腹致命三傷應以楊炳論抵將楊炳楊志興均擬絞監候楊省方等分別擬杖等因具題應如該署撫所題楊炳合依共毆人因而致死者以致命傷為重下手致命傷重者絞律擬絞監候秋後處決楊志興合依鬪毆殺人律擬絞監候秋後處決該署撫既稱楊省方傷已平復合依餘人律杖一百賴皇極雖

未同行但不合令賴益興等往偵牛隻致起鬪端合依不應重律杖八十時逢熟審各照例減等先行折責發落賴皇極所失之牛查出另結等語應均如該署撫所議完結奉

旨楊炳楊志興俱依擬應絞若監候秋後處決餘依議



片...

...

